

江表府志

二十一下

漢書門			
二	三	九	八
九	一	八	號
四	四	函	架
冊	冊	冊	冊

內閣文庫			
二	三	九	漢
九	一	八	書
四	四	函	架
冊	冊	冊	冊

內閣文庫			
番號	漢	2398	
冊數	48 ( 31 )		
函號	292	14	





電... 熒熒般若本來人題畢投筆而逝

文庫

魯昂字廷瞻江寧人性勤敏弱冠始知學即寵益上

舉成化二十三年進士授兵科給事中時院判劉文

一奏... 奏太宰王恕出政府意舉朝莫敢頌言昂獨上

此... 插其奸天下快之太監李廣駙馬都尉齊世恩怙

寵... 奪民田下昂勘問悉還民間轉戶科都疏文武

大臣不法事忌者益眾會李廣死賄賂盈籍昂言宜

置諸饋者于法事連太僕少卿楊瑛瑛故給事中也

遂撫拾奏昂下詔獄鞫訊無驗謫蒲圻令投檄歸語

所親曰吾非薄蒲圻顧性戇直終不能俛仰耳尋以



例復戶科給事中致仕與縉紳語及時事輒感慨悲壯未嘗一語及私

徐完字用美江寧人事親至孝成化丙戌進士拜監察御史時抗論臺臣有聲以親老乞就養南都完風采挺然時都御史多不法完抗疏劾免之百僚憚焉然性樂易無城府雖面折人過而無宿怨無後言人亦不深銜也會湖廣讞獄論死者數十人完覆訊止坐五人餘悉駁免擢江西按察僉事卽休致家居雅素論議猶侃侃子九疇正德癸酉舉人官知府

完字憲之江寧人少與兄文成茹苦力學登成化

壬辰進士任龍泉知縣拜御史歷轉南京右都御史以南京戶部尚書致仕所至政聲籍甚性敏捷見事疾當機輒發無所避然常求情于法中其請老歸也田宅無所增曰吾親起儒官貧素今亦足矣待諸姪無異已出與故舊處猶布衣也

金澤其先鄞人徙江寧少嗜學勤敏日居學宮成化丙戌進士授刑部主事進郎中擢四川布政司叅議蜀大饑上命給漕糧二十萬石以賑澤轉運有方所活甚衆進布政拜都御史進南京刑部右侍郎改兵部轉南右都御史致政澤鎮靜有容得大臣體歷仕三



朝轉十四官而無秕政居室翼如室無姬侍

陳銅字堅遠其先鄞人籍太醫院銅獨喜儒術從師遊講讀不勸舉成化乙酉鄉試授黔陽知縣爲政通大體恤養惇獨民有無告者闢荒田俾墾爲已業積穀數千石以備荒年民翕然以懷迺興學校謹禮讓黔俗居喪擊鼓群歌歌且俚銅知難卒禁也獨教以歌哀辭俗遂改沅湘水合流域下數壞民居迺治石堤幾萬尺水遂不溢縣南有道崖石險狹僅容人跡辰沅諸路軍戍靖州者往往夜墮崖下銅聚薪烈石而鑿之外繚以索行者賴焉秩滿當去民遮道泣問罷長沙通判修復岳麓書院士子絃誦一時爲盛以喪歸遘疾卒

伊乘字德載吳人爲應天府學生勵志學問聞四明楊文懿公邃于易不遠千里從之舉成化甲辰進士授南京刑部主事員外郎管諸司奏贖稱其學擢四川按察僉事理冤抑治饑民討除劇賊稱其政三載乞終養遂不復仕子伯熊正德丁卯舉人孫敏生嘉靖壬辰進士曾孫在廷嘉靖乙丑進士

強毅字致遠自幼異常兒母病癱且劇親爲洗濯中夜忘寢年五十貢入監登弘治十七年順天鄉薦就選



江寧府志 卷二十一  
授紹興府推官府有疑獄十數毅至剖決咸允人稱  
爲神明性慙直上官有反駁或論議稍不合輒與爭  
辨甚至拂衣而出以是見讓于當路在官兩載歸去  
後民多思之年八十三卒

郝勝字廷美其先河間寧津人父忠以廕改南京羽林  
指揮勝年十五入武學讀書綴文與儒生等江東名  
士樂與之遊繼父官懋著聲績累遷都指揮僉事奉  
勅守備儀真軍務嚴飭盜賊平息而廉慎詳密百廢  
俱舉民畏愛之壬辰奉勅備倭鹽徒金藩等犯嘉定  
上海聞之散去已而復乘巨艦數百欲犯江陰勝率  
衆捕獲之俘獻于朝漕運總兵平江伯薦勝充  
協同漕運仍鎮守淮安地方乙巳山陝饑奉勅運米  
百萬餘石往濟之是年平江內擢勝代之三歲陞中  
府都督上疏乞休致卒于家

顧璘字華玉上元人弘治丙辰進士廣平知縣南吏部  
驗封司主事稽勲郎中開封知府謫全州知州起知  
台州府歷叅政按察右副都御史巡撫湖廣陞刑部  
右侍郎尋改吏部會顯陵肇工改工部左領山陵事  
進尚書改南刑部璘融朗濶達精於吏理能激昂任  
事其爲開封鎮守中官廖堂乃逆瑾黨予奪自恣璘



每加摧抑不令得肆瑾誅廖罷去而錢寧用事王宏繼鎮尤諄謾氣焰讐人有司多屈節自容璘不爲禮有所徵需不答積忤宏矯詔逮錦衣獄吏問狀璘據理執誼抗言條對宏遣邏卒陰探郡中無所得乃文致他比以竟其獄獄成徒知全州及起撫湖南益事振植湖湘遐曠提封數千里撫臣尊重受計坐理而已璘輶車省循徧歷州郡雖徧疆下鄙莫不臨蒞跋涉險阻不少厭却故事巡歷所在必以藩臬守臣自隨璘悉謝遣軒車簡易廉從歛約供頓次舍才足用民按堵不知爲勞所至勸農振業平繇復稅而省伏省微軌迹尋易民用安集在鎮逾年多所建白首古地瘠民貧兵食不足而藩府賦祿無隄後繼爲難又以湖湘控扼邊徼地大事繁御史按部歲一更代勢不得周欲乞添差御史分蒞河南北以廣詢謀所言凡數十事皆當時利病深切治理論者聽其言云顯陵之作經費不貲璘旣長于料簡而程省費懈調發有制視他所營率損費十五而功實倍之璘爲文不事險刻而鑄詞發藻必古人爲師詩矩矱唐人而劉芟陳爛時出奇峭樂府歌詞不失漢魏風格云璘子嶼字懋涵少年文譽騰踴督學蕭鳴鳳試鳳臺春



曉詩唐初四子贊援筆立就蕭歎賞謂璘有子後以  
歲貢卒嶼子應祥亦以詩名

劉麟字元瑞廣洋衛籍千戶蒼子弘治丙辰進士外戚  
張氏驕橫臺諫龐津等歷詆罪狀上震怒下詔獄麟  
上疏申救清議重之授刑部主事轉員外郎出守紹  
興精核廉敏逆瑾修郎署時舊隙黜爲民郡人爭致  
贖麟却之曰勤苦諸君吾治不逮前劉敢蒙一錢惠  
耶郡故漢劉寵所治旣去越人肖其像爲小劉祠麟  
貧不能歸乃寓長興與孫一元龍霓陸崑吳琬相往  
還稱茗溪五隱瑾敗起知西安父沒葬長興遂居瀆

南坦上因號南坦服除陞陝西叅政歲饑邊警

遣貴臣督兵餉擬加賦麟獨不可曰靖邊本以衛民  
民可先凶乎議遂阻而軍興亦不乏累遷工部尚書  
奏建節慎庫與臺臣同典出入歲一查盤自是財無  
濫用奏裁工部上供十四事請罷遣璫督造龍袍于  
蘇松中官憾之致仕家居三十餘年蕭然一室賦詩  
自娛建安李尚書嘗訪之于峴山了無宿具以乳羊  
博市沽風雨瀟瀟欣然達夜好樓居而力不能構用  
篋籃輿懸之于梁僅可弓卧其上下收放皆自握之  
不用他人名曰神樓文徵仲作神樓圖遺之以壽終



江寧府志 卷二十一  
贈太子少保謚清惠子牖以蔭敘官

羅鳳字子文水軍右衛籍弘治丙辰進士性峭直砥礪廉隅官南臺緝有風采雖處鄉國無少骫屈出守兗州時屬車屢動傳言有事太山東撫欲額外征取以備巡幸鳳不應被劾改守鎮遠復忤巡方再移石阡乞致仕家居二十餘年卒年八十有餘博雅好古所蓄法書名畫金石遺刻多至千種工詩老猶劬書所著稿皆手自謄寫云

鄭獻驍騎右衛人弘治己未進士授江西新喻令居官廉正陞刑部主事歷郎中出守高州改南昌時宸濠蓄異志招巨盜閔念四等潛劫江淮獻捕之每事裁抑濠誣奏捶殺王府校尉購錢寧矯詔撫按提問濠令校尉鎖入府凌辱萬狀乃送有司濠反因械繫之于小船錮守之忽風吹船開見鄰船舊兵獻諭以禍福衆共釋其縛奪馬潰圍登岸一呼從者千人斬賊將范成等赴王新建軍門備陳賊勢烏合易破請速進兵陽明嘉之授以兵四百名使巡守俘賊甘桂等三十四人賊平復任以訐直忤當道又與舊屬楊材爭道爲所誣奏侍郎吳廷舉給事中毛玉副都御史伍文定不平皆疏辨之上以獻抗逆不屈又有斬獲



江寧府志 卷二十一 人物  
功擢山東鹽運使子守矩有文名嘉靖壬子舉人令  
邵陽廉明仁恕以乏嗣乞休里居三十餘年神采不  
衰卒年八十有三

龍瑄字克溫牧馬所人才名籍甚與丘仲深羅燧正陳  
公甫爲布衣交重然諾尚風義朋游有急竭力從事  
江湖間豪士每曰過金陵不識龍克溫猶徒行也自  
號半閒居士顧東江作半閒居士傳子霓弘治癸丑  
會魁官副使罷歸入茗溪社與劉南坦齊名有詩集  
行世

姚隆字原學籍留守後衛舉弘治壬戌進士初令浙之  
新昌時旱民多流殍設法賑濟多所存活數辨冤獄  
有懷百金謝者峻拒不受陞主客司郎中出守荊州  
威惠並行明年大水人附高阜大樹日夜嗷嗷隆命  
人駕小舟千艘以濟之仍各給以米活者數千人是  
冬大雪殍者塞途又搭席舍于江岸以庇趨食者而  
于近境爲粥以啖之活者亦數千人又明年修築黃  
潭等處決堤曲盡規畫雖工費數萬緡皆不取于民  
時取佛中官過郡從者殺人捕而抵罪中官恐以奇  
禍隆不爲變政績大著歌謠載道忽罷歸民皆扶老  
携幼攀轅號泣至不可前爲祠肖像以祀之歸家不



入城府不道時事有田僅供朝夕處之裕如

張琮字廷憲江寧人文僖益之從孫弘治庚戌進士爲禮部儀制郎中孝宗不豫免長至賀東宮親王如故事琮請于尚書曰未有天子不豫而太子諸王受賀者時黷其議晉藩有奪王封者時劉瑾受賂琮執不可瑾曰一郎中力能勝尚書耶出爲陝西叅議奪者卽如請後謫琮爲濟寧知州改監察御史巡按甘肅時安化餘亂未息琮恤無辜而治有罪邊民以安瑾誅擢按察副使累官至南京右都御史門可羅雀乞致仕卒賜祭葬子恕嘉靖壬午舉人官僉事以賢世

其家

楊銳南京衛籍守備安慶膽智過人宸濠之叛也畱兵守南昌自率大軍盡奪官民船蔽江而下聲言直取南京豫伏奸人爲內應過安慶將順流飛渡銳與知府張文錦等誓死固守令軍士鼓譟登城大罵之濠怒遂駐師督衆運土填塹內薄攻城城上矢石如雨賊衆多傷數日不能克濠令僉事潘鵬遣其家人持書入城諭降銳手斬之支解投城下賊衆氣沮會王新建兵入南昌濠回兵救之安慶之圍始解遂擒賊成功議者以爲是役也濠乘初起之銳使順流而下



事未可知非銳等激怒之濠必不畱攻安慶銳之功大矣

金賢字士希江寧人偉幹修髯顧盼偉如舉弘治十五年進士授給事中奉命勘兩淮重獄時閹瑾亂政諸司讞獄非取其意旨不敢決賢操三尺不少徇瑾恨之出守大名有政聲已而中忌徙延平毅皇轍遍天下所至不寧賢乃請老不俟報而歸賢重倫睦族振人之急王太僕常白首交也常有所貸常死卽取質劑焚之精于春秋病諸傳之外令微文隱約不見于後乃以所自得爲紀愚十卷或問百篇行世子大車字子有幼負才名沉默矜重嘉靖乙酉舉于鄉父遺產千金悉予諸弟人有所貸每爲焚券博綜藝文非古弗程大輿字子坤高才困諸生脫粟不厭處之裕如各有集

王常字欽佩徽之子沈毅清介動準禮法性至孝奉二親禮恭氣和小心周慎如一日登弘治乙丑進士庶吉士念親老乞爲南考功主事南曹考察力持公論擢河南督學凡請托一切謝絕有被黜者則深自引咎士咸歸心擢南太僕少卿時居母憂且病竟卒顧東橋兄弟選其遺文刻之名南原家藏集子逢元字



子新亦能詩常父子又俱善書人遂以大令呼子新  
又因其家代有文人曰王謝至今不衰

邵清字士廉江寧人幼有至性母卒時纔三歲置於別  
室清號泣欲往視聞者異之長端潔好學弘治壬子  
舉於鄉授江西德化教諭教諸生必以孝弟節義爲  
言束修問饋之儀無敢及門者乙卯秋山東巡按聘  
典試事志在甄拔才俊高下咸自主斷巡按素重其  
名不易也事竣卽日就道有謁贄者拒不受藩臬交  
章薦之考上上選授監察御史教職擢臺臣自清始  
也委督抽分豪猾射利隱沒者皆置於法正德初成

晚張延齡恃恩奏人負券若干緡有旨與追清曰御  
史朝廷耳目之官可爲人索私債耶逆瑾擅政索清  
賄不入矯旨遣官校捕至榜數十罷歸家居閉門灌  
畦圃瑾怒猶未釋仍罰米三百石交親爲代償乃得  
足瑾伏誅廷臣追訟其冤嘉靖壬午復御史陞雲南  
按察僉事己丑改廣西左江兵備所居皆膏脂不以  
一毫自潤乞休得允杜門謝賓客宗伯霍韜雅重清  
以所毀淫祠田餽清清不受疾革語其子曰爲已謹  
獨甚難又曰兢兢業業過此生務要保全無過至瞑  
目心始安耳



李熙字師文上元人父昊成化己丑進士以簡討改南  
禮科給事中因黑青之異力陳時事陞浙叅議值水  
災寬民逋負熙弘治丙辰進士任將樂知縣拜南京  
監察御史事多執法鄉里有不悅者熙曰朝廷與鄉  
里孰重耶逆瑾擅政以言事械繫被重刑落職歸又  
以劾二府貪吏瑾見其故牒復行南京杖三十幾死  
熙在府獄人爲之憂熙方作外舅壽頌數百言人見  
之歎服不已嘉靖初詔起爲饒州知府顧華玉稱其  
玩無奇石器無精斃蓋實錄也轉浙江按察副使卒  
於官

梁材字大用其先大城人籍金吾右衛舉弘治十二年  
進士授德清知縣以廉介著稱入爲刑部主事折獄  
明審曉律令諸所擬當皆麗情法逆瑾用事每以意  
生殺人材據法力爭不少屈晉郎中改監察御史出  
知嘉興府調杭州皆有惠政而在杭尤著始至適歲  
饑告濟者塞路材語云五日卽發粟以賑時倉無儲  
積人皆惑之材密訪某鄉某人有粟若干斛皆得其  
實屆期材親至其家曰汝有粟若干當糶半以銀償  
之卽命賑其鄉人事完以報一日數處皆遍饑民數  
萬卽日皆得食無侵漁畱難之弊遠近大服陞浙江



按察使轉補雲南先是有土酋相仇殺御史屢勘未  
結將謀變材至曰是未可治以中國法乃以贖論土  
酋驚喜聽命御史難其太輕材曰不爾則變矣後偵  
知酋果密調兵聞無他故乃止累遷戶部尚書總覈  
財賦裁抑冗費條奏十餘事會計爲清未幾致仕後  
以戶部難其人仍以材任適遇考察京官肅皇素知  
材清正命監部院考察凡黜陟進退材議居多是歲  
刑部有疑獄四事上命掌刑部讞之俱得其情奏上  
上喜曰得尚書十二人如材者朕可無憂矣在職六  
年眷注甚厚加太子少保竟以忤權貴罷職其清慎  
之操始終一致歸家甫兩月卒隆慶初賜葬祭贈太  
子太保諡端肅孫桂茂善八分書官臨安知府歸出  
積俸與兄均受不以自私鄉里重之

王鑾字汝和其先吳江人隸籍錦衣衛舉正德辛未進  
士試政吏部時流賊甫平鑾爲原治二篇大略謂今  
之賊盜皆繇守令非人監司惟利趨承撫按罔覈實  
效以至浸淫潰敗弭盜之本在禁奢立禮敦教化嚴  
貪墨太宰楊一清異之補文選主事秉公持衡不與  
人交接尋改考功節益峻朝散扃鍵自防人罕識其  
面晉驗封郎中武宗南巡鑾上疏力諫廷杖致傷踰



年卒士論惜之

史忠字廷直豪俠不羈薄權貴有不合輒引去或徑以言折之不顧遇所善則流連忘懷無貴賤皆與款洽自號癡翁作卧癡樓于冶城之麓列圖史敦彝位置雅潔有酒引客談笑醉則按拍歌新詞清亮遏雲有時出遊不告家人所往嘗訪沈石田于吳門沈他出堂中有素絹潑墨成山水巨幅不通姓名而出石田曰必金陵史癡也要之歸留三月而別石田來金陵亦館于卧癡樓嘗贊其像曰旁若無人高歌濶步玩世滑稽風顛且癡灑筆淋漓水走山飛忠有女及笄婿貧不能具禮癡翁詭携觀燈同妻送至婿家取笑而別年踰八十預命發引已隨而行謂之生殯其達生玩世如此

金琮字元玉自號赤松山農遐嘯清視人莫能窺王公大人非先施不造其門書法精工文待詔極喜之得片紙皆裝潢成帙題曰積玉與史忠稱金陵二隱有江南二隱稿弟瘡字元善精于醫旁及繪事瘡治病不計利常責人禮貌戶部尚書延之醫夫人痰火兩服而愈尚書寫數百言敘病源索丸藥方因圈其句讀以與之瘡援筆答一書亦圈其句讀尚書見其文



法古字畫工乃愧曰吾之過也命駕訪之遂爲知己  
每云金陵醫中有人

周金字子庚籍府軍右衛正德戊辰進士擢給事中豁  
達警敏有經制才都督馬昂進女弟奸謀叵測力諫  
山之人以爲難尤通達邊務凡山川險易將士勇怯  
守禦難易皆習知之與客縱談如在目中歷陞僉都  
御史巡撫延綏宣府善撫將士得其心力宣府糧不  
繼衆大譟將爲變金肩輿撫諭之投戈解散徐治其  
渠帥而已邊告無事乞歸久之起撫圻內入佐本兵  
擢右都御史總督漕運章聖梓宮南祔始奉旨山江

而諸護行大臣至儀真議從陸衆知不可而不敢言  
金獨力言沿江山險路不可通且奉梓宮上下山阪  
恐有撼頓柰何乃從江沿江千里居民免伐樹發屋  
役夫數萬人得無走死山谷者金之力也致仕歸卒  
賜葬祭贈太子太保謚襄敏子仕官至苑馬寺卿  
徐霖字子仁號髯仙江寧人才畧不群武宗南巡召見  
試除夕詩百韻及應制詞曲皆立就語多譎諫上屢  
稱善嘗午夜乘月幸其家上命置酒惟蔬笋鮭菜上  
喜引滿扈從還京每夜宿御榻前與上同卧起將授  
官禁近固辭世廟繼立逮治威武近幸皆坐罪而子



仁獨超然無累天下高之嘗得篆法于異人李相國喬太宰以爲二李不能過名播海外日本安南皆重購以歸開快園結賓客豪放自得年八十以壽終

景暘字伯時上元人年數歲隨其父官廣州劉大夏見其文異之曰此子方爲國器正德戊辰舉進士第二人除翰林編修時逆瑾亂政陵轢朝士見者屏氣暘獨弗阿每當進講必越宿齋沐覲有感悟在館職九年遷國子司業以資當晉侍讀梁儲曰成均士子師範非君不可六館諸生人人以爲得師二年改左中允管南京國子司業事南方士習競便剝有請囑者

切謝絕士習稍正辛巳以母憂去位甲申起復方就道染疾旬日而卒暘清介過甚居官如布衣時坦易溫直望之知其爲有養者性篤孝義初母目盲百計莫療暘旦夕禱于神一日雙眸炯然舊疾如失有姊早寡奉與母居爲嫁娶其子女友人張貢見暘女欲與婚未聘也貢尋卒暘哭曰曩吾心已許之忍負亾友乎召其子妻之鄉人莫不多其事卒時方四十九識者共惋惜之

王以旂字士招江寧人登正德辛未進士授江西上高知縣時華林賊方熾數剽掠縣境而流賊復往來江



上上高爲賊衝以旂團結鄉兵諸要害處遍置鐵蒺藜又聲言欲搗巢穴賊偵知不敢犯入爲監察御史巡按河南會宸濠叛鎮守闔劉璟與通謀倡言上親征道出汴取藏銀四萬兩備供應諸司莫可誰何以旂徐譬曉之曰大駕所經供應誠不可緩俟敕至圖之未晚萬一從他道銀散其責安在璟不敢言後逮捕璟籍其家僉服其見嘉靖時巡按福建賊劫安溪永春延及尤溪以旂度且犯福寧檄兵備禦賊謀大沮以親老乞養家居且十餘年父卒服闋起提督北畿學校歷官兵部右侍郎是歲徐呂洪渴漕舟滯不行遣以旂督治至則先求故道視泉脉循經流塞分殺自徐洪南抵沽頭增置閘又相地形引水塹築土壩河流時滙漕舸皆如期達京師汶上寧陽之間有水櫃四勢豪浸沒詭獻德邸藉灌溉爲私利以旂上言水櫃以備畜洩河溢則懸河以入湖河溢則懸湖以入河遂任怨力復之至今賴焉事竣加俸一級擢掌南臺以風憲重臣居梓里舊宅在聚寶門外每歲時歸祀必由他道謂諸子曰昔張湛入里門必步此可取爲法也召入爲工部尚書尋改兵部先是陝西總督侍郎曾銑議復河套奉命集議以旂謂套誠當



復第區處當預定乃條十餘事以上會嚴嵩惡銑有旨逮獄卽命以旂代之以旂聞命就道軍中務爲鎮靜明部伍遠斥堠日休沐士卒而撫循之軍中皆願一戰不許甘肅關廂有哈密熟蕃畱住種類日繁以旂恐爲中國患謀徙之關外乃繕室廬計口授田俾爲生計諸蕃聽命在鎮六年屢著戰功開誠布信邊境以寧疾作乞致仕卒于固原鎮邊民號泣罷市賜葬祭謚襄敏

顧璲字英玉璘從弟也警悟好學弱冠聲名翕然舉正德甲戌進士累官南京刑部武選郎中故舊一切謝絕曾有旨本允員請囑不行明年謫知許州許冠帶邑多豪猾璲治頗尚惠文而時時有所縱舍歷陞河南副使風裁益峻與部使者論事有不可輒封還移文同官駭愕璲曰朝廷置外臺爲耳目枉法媚人吾不爲竟以是罷歸璲高自負許恥諧于俗居官常俸外秋毫無取比歸家益窘昕夕不繼處之晏如嘗曰貪賄請囑與武斷鄉曲雖略有差等皆非知恥畏義者所忍爲臨街一小樓扁曰寒松訓蒙自給兄璘闢息園賓從如雲招之多不赴惟與一二鄰父典衣沽酒爲歡而已孫端祥字孝直以貢授汝寧通判縈已



慎事嘗署府篆錢糧羨餘分毫不染悉備穀貯倉次年大荒賴以賑濟年餘七十猶手不釋卷端祥子夢游有詩名里人爲刊其集

謝承舉字子象上元人父知府芳有孝行承舉八歲賦詩有紫塞風寒鴈叫霜之句人以神童目之長益博洽風雅爲文豪宕如奔流掣電書法米蘇棄舉子業自放于山水間每與客縱談古今詞鋒颯發一座皆傾酒酣賦述引筆疾書輒盡數紙暇則出游諸寺談空習靜條然塵表與任德友善德字仲修文學高古博雅能詩時又稱任謝云承舉子少南登嘉靖壬辰進士傳其家學

李重字遠菴金吾後衛人正德辛未進士授戶部主事時芻粟皆中官預之重以清苦自持中官餽遺悉拒卻爲時所重明年督賦兩浙鎮守太監劉璟侵官銀至二十萬計欲厚有所餽冀鉗其口重正色曰與其遺我孰若爲民償所負以足國乎璟憚其嚴盡以所侵輸官由是兩浙宿負完百三十餘萬前此未之有也歷員外郎擢德安府會有告宗藩群校豪橫不法事悉寘如法以是構釁至遣廷臣鞫之事始白謫官歸民哭送之戊子漕河壅用大臣薦起工部郎中擢



守九江進江西按察副使持法不能俯仰與上官不  
協罷歸與同里邵侍御清顧憲副璵志趣相同重清  
操峻刻鑿裁獨别好汲引後進官浙時拔鄭端簡公  
曉于稠人之中每以第一人期之鄉薦果第一後官  
南曹謁重于故里袖有所贈逡巡不敢露重詰之始  
云門生婦製一布履未知敢達否重哂而受之家法  
素嚴在任夫人置一耳環重取投之于水歸里後偶  
見僕人卧漆床問所自來僕對以隨任所得重大怒  
卽責令負床還任所取縣收以復所居敝廬無以葺  
治值一卿貳來謁忽屋漏塵土墮客茶甌中重恬不  
爲怪卿貳改容盡吸之曰吾飲公清德也子种嘉

丙午舉人

陳沂字魯南綱之子五歲能屬句十歲爲詩文嘗著孔  
墨辨赤寶山賦人傳誦焉比長益博綜羣言爲文有  
蘇氏風登正德丁丑進士選庶吉士除編修與修武  
宗實錄甲申與鄒守益楊慎等再論大禮乙酉實錄  
成進侍講每經筵進說必委曲寓規諷意世廟問宰  
執知其名忤永嘉出爲江西叅議督賦諸郡民皆稱  
便進山東左叅政按沂莒滕費察其災荒發官帑市  
牛給民耕墾歲則大熟又爲蠲馬種薪木運布諸征



凋瘵獲甦嘗按鉅野有群盜謀劫縣沂偵知之調兵掩捕盜驚散改山西行太僕卿疏乞歸築遂初齋杜門著述絕意人事沂詩宗盛唐文出入史漢晚益臻理奧時大江南北稱朱顧陳王四大家所著甚富山東通志南畿志皆其筆削云子時萬嘉靖甲午舉人何遵字孟循欽天監籍爲人任質不尚矯激居常呐呐然於世故泊如也因自號曰味淡舉正德甲戌進士授工部主事督商稅荊州荆故利府以墨敗者相繼遵處之淡然不染已卯返命值武宗頻巡幸逆臣汪彬寔導之遂歷上谷雲中諸邊至是有詔除道將登封岱宗遵與會浮江漢而上以禱于太嶽逆藩禍且莫測兵部郎中黃鞏修撰舒芬等暨遵先後進諫彬怒矯詔下鞏等獄且以死脅言者遵不顧復上疏言鞏等無罪不宜誅諫臣語益剴切彬愈怒并下遵于獄榜掠瀕死復罰跪廷杖逾二日竟死遵之將諫也貽書鄉人周金陳沂以親老爲託語不及私嘉靖初錄遵忠贈尚寶司卿子世守遺腹生以廕授臨江通判值洪水爲害世守願以身塞之而潮退平謝法四之賊黨而民安判永昌定木邦之亂起補吉安除寇救荒舉天下清官第一人以病乞休歸



劉璽字廷守龍驤衛人正德間擢江西都司時巡撫盛公應期知其廉明每屬以疑獄多所平反璽乃請依期給糧以卹軍士清宿弊以杜奸宄革吏民入司之公罰除衛所冊文之扛解移廢府之餘財以立官署出城濠之租稅以歸公府善政美意不一而足王文成總制江西一見重之巡按穆公相疏薦有僚友比之學官家人謂之窮鬼等語及推總漕運上識其名喜曰是前窮鬼耶亟可其奏璽奏增餘丁月糧以均勞逸定考課以裨軍政明清規以一衆心疏濬江河道以濟糧運折兌米以免稽遲凡三十餘疏垂為漕政良規郭勛方有寵囑市南物于運舟公載入都以網利璽不應以疾請告久之總漕非人復召璽竟以直忤當道罷歸

管景字子山上元人幼穎拔嗜學屢舉不第嘉靖中貢入太學授廣信府檢校監司聞其才檄署永豐又署上饒適橫峯窰民作亂監司檄景往景宣布威德作勸善懲亂箴以示之盜悔過多散去殺賊魁以獻餘悉不問民乃安爭塑其像祀于家遷布政司檢校嘗修上元縣志後大京兆葉公以府無志亦屬景為之志成藏于府萬曆間汪京兆宗伊重修之同景修志





者徐霖劉雨也雨字潤之文最高古名更重于諸公  
志中雨筆削居多

何鉞字勳伯江寧人父瑄善天文鉞穎異不群見曆算  
輒能通曉治詩入郡庠文譽蔚然登正德辛丑進士  
授行人奉使楚藩擢浙江道御史秉道直言不識忌  
諱時武廟欲毀民居為演武場鉞抗諫得止奉敕清  
戎務閱軍器奉法惟謹剔蝨始盡救建言下獄御史  
得未減出按兩浙擊貪發奸吏治肅然擢荊州知府  
賑恤饑民均給宗祿咸有條理調守常德釋禁併驛  
民困以紓致仕歸不妄交遊時庄居少入城市 終





